

সারাদেশ

কম্বোডিয়ায় চাকরির প্রলোভনে নারী পাচার: মূলহোতা গ্রেপ্তার

প্রতিবেদক: প্রো

প্রকাশের তারিখ: রোববার, ৩০ আগস্ট ২০২৬, ০৫:২৩ PM



ছবি: সংগৃহীত

কম্বোডিয়ায় উচ্চ বেতনের চাকরির প্রলোভন দেখিয়ে এক নারীকে পাচার, তাঁর কাছ থেকে অর্থ হাতিয়ে নেওয়া, পাসপোর্ট জোরপূর্বক নিয়ে নির্যাতন এবং বিভিন্ন অবৈধ কর্মকাণ্ডে বাধ্য করার অভিযোগে মানবপাচারকারী চক্রের এক মূলহোতাকে গ্রেপ্তার করেছে পুলিশের অপরাধ তদন্ত বিভাগ (সিআইডি)।

মঙ্গলবার (২১ জুলাই) সিআইডির মানবপাচার শাখা (টিএইচবি) ফরিদপুরের চরভদ্রাসন থানা এলাকা থেকে মো. রুবেল (২৯) নামে ওই ব্যক্তিকে গ্রেপ্তার করে। তাঁর বাড়ি রাজবাড়ীর কালুখালী উপজেলার খাগজানা গ্রামে।

সিআইডি জানিয়েছে, ভুক্তভোগী নারী আর্থিক সংকটের কারণে স্থানীয় একটি এনজিও থেকে ঋণ নিয়েছিলেন। ওই এনজিওতে কর্মরত রুবেলের সঙ্গে কিস্তি পরিশোধের সূত্রে তাঁর পরিচয় হয়। একপর্যায়ে রুবেল কম্বোডিয়ায় কাস্টমার কেয়ার সার্ভিসে উচ্চ বেতনের চাকরির প্রলোভন দেখিয়ে তাঁকে বিদেশে পাঠানোর প্রস্তাব দেন।

অভিযোগ অনুযায়ী, বিদেশে পাঠানোর প্রক্রিয়ার অংশ হিসেবে অভিযুক্ত প্রথমে ভুক্তভোগীকে এক লাখ টাকা ঋণ নিতে সহায়তা করেন। পরে সেই অর্থ নিজের কাছে নিয়ে নেন এবং তাঁর পাসপোর্টও সংগ্রহ করেন। পরবর্তীতে বিদেশে পাঠানোর নামে বিভিন্ন সময়ে আরও অর্থ নেন। ভুক্তভোগী ধারদেনা করে অভিযুক্তের দেওয়া ব্যাংক হিসাবে দুই লাখ টাকা জমা দেন। সব মিলিয়ে তাঁর কাছ থেকে চার লাখ টাকা নেওয়া হয়।

২০২৫ সালের আগস্টে ভিসা ও বিমান টিকিট দিয়ে ভুক্তভোগীকে কম্বোডিয়ায় পাঠানো হয়। সেখানে পৌঁছানোর পর চক্রের সদস্যরা তাঁর পাসপোর্ট ও সঙ্গে থাকা অর্থ জোরপূর্বক নিয়ে নেয়। পরে তাঁকে বিভিন্ন প্রতিষ্ঠানে স্থানান্তর করে অনিচ্ছাকৃত কাজ করানো হয় এবং তাঁর উপার্জিত অর্থ আত্মসাৎ করা হয় বলে অভিযোগ রয়েছে।

মামলার এজাহারে বলা হয়েছে, একপর্যায়ে তাঁকে বিভিন্ন অবৈধ কর্মকাণ্ডে অংশ নিতে বাধ্য করার চেষ্টা করা হয়। এতে অস্বীকৃতি জানালে তাঁর ওপর শারীরিক ও মানসিক নির্যাতন চালানো হয়। দেশে ফিরতে চাইলে তাঁকে প্রাণনাশের হুমকি দেওয়া হয় এবং অন্য দালালের কাছে বিক্রি করে দেওয়ার ভয় দেখানো হয়।

পরে ব্র্যাক মাইগ্রেশন প্রোগ্রামের ব্র্যাক মাইগ্রেশন ওয়েলফেয়ার সেন্টার এবং সংশ্লিষ্ট আন্তর্জাতিক ও মানবিক সংস্থার সহায়তায় গত ১ জুলাই ২০২৬ দেশে ফিরতে সক্ষম হন ওই নারী। দেশে ফিরে তিনি সংশ্লিষ্টদের সহায়তায় অভিযুক্তদের বিরুদ্ধে মামলা করেন।

সিআইডি জানিয়েছে, ভুক্তভোগীর দেওয়া তথ্য, সাক্ষ্য-প্রমাণ, নথিপত্র ও গোয়েন্দা তথ্য বিশ্লেষণ করে অভিযুক্তদের শনাক্ত করা হয়। এর ধারাবাহিকতায় গত ২১ জুলাই প্রধান অভিযুক্ত রুবেলকে গ্রেপ্তার করা হয়।

গ্রেপ্তারের পর তাঁকে আদালতে সোপর্দ করা হয়েছে। আদালতের আদেশে তাঁর জবানবন্দি গ্রহণ করা হয়েছে। জবানবন্দি ও তদন্তে পাওয়া তথ্যের ভিত্তিতে মানবপাচার চক্রের অন্য সদস্য, আর্থিক লেনদেন, বিদেশে অবস্থানরত সম্ভাব্য ভুক্তভোগী এবং দেশি-বিদেশি সহযোগীদের শনাক্তে তদন্ত চলছে।

সিআইডি জানিয়েছে, এই আন্তঃদেশীয় মানবপাচার চক্রের মাধ্যমে আরও কোনো বাংলাদেশি একই ধরনের প্রতারণা ও নির্যাতনের শিকার হয়েছেন কি না, তাও খতিয়ে দেখা হচ্ছে। এ বিষয়ে দেশি-বিদেশি সংস্থা এবং আন্তর্জাতিক সহযোগী প্রতিষ্ঠানের সঙ্গে সমন্বয় করে তদন্ত কার্যক্রম পরিচালনা করা হচ্ছে।

এ ঘটনায় দেশের নাগরিকদের সতর্ক থাকার আহ্বান জানিয়েছে সিআইডি। বিদেশে কর্মসংস্থানের ক্ষেত্রে উচ্চ বেতনের চাকরির প্রলোভনে বিভ্রান্ত না হয়ে সরকার অনুমোদিত বৈধ প্রক্রিয়ায় বিদেশ যাওয়ার পরামর্শ দেওয়া হয়েছে। পাশাপাশি বিদেশে পাঠানোর নামে প্রতারণা, মানবপাচার, জিম্মি বা নির্যাতনের কোনো তথ্য জানা থাকলে দ্রুত আইনশৃঙ্খলা রক্ষাকারী বাহিনী বা সিআইডিকে অবহিত করার আহ্বান জানানো হয়েছে।

এ বিভাগের আরও খবর



পদ্মায় নিখোঁজ ছাত্রদল নেতা রুকের মরদেহ উদ্ধার
কুষ্টিয়ার ভেড়ামারায় পদ্মা নদীতে নৌকা ভাঙে গিয়ে হারিয়ে গিয়েছিল পিলাবের সঙ্গে থাকার লেগে নিখোঁজ ঝিনাইদহের শৈলকুপার পৌর ছাত্রদলের সদস্য...



আন্তগণ্যে রুমিন ফারহানাকে অবাস্থিত ঘোষণা, বিএনপির ঝাড়ু মিছিল
জাতীয় সংসদে বিএনপির সমালোচনা করে দেওয়া বক্তব্যের প্রতিবাদে ব্রাহ্মণবাড়িয়ার আন্তগণ্যে ব্রাহ্মণবাড়িয়া-২ আসনের স্বতন্ত্র সংসদ সদস্য ব্যারিস্টার...



সাতক্ষীরায় সড়ক দুর্ঘটনায় পথচারীর মৃত্যু
সাতক্ষীরায় যাত্রীবাহী বাসের ধাক্কায় আব্দুল মাজেদ (৬০) নামে এক পথচারী নিহত হয়েছেন। আজ রোববার সকাল সাড়ে ১০টার দিকে সাতক্ষীরা-খুলনা মহাসড়কে...



ব্রাহ্মণবাড়িয়ায় কনসার্ট ইস্যুতে সমঝোতা, মানতে হবে যে শর্ত
ব্রাহ্মণবাড়িয়া সরকারি কলেজের নবীনবরণ উপলক্ষে কনসার্ট আয়োজনকে কেন্দ্র করে সৃষ্ট বিরোধের অবসান হয়েছে। শনিবার (১৩ সেপ্টেম্বর) সন্ধ্যায় ব্রাহ্মণ...

